

3

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

MAR 30 1955

TS237.7/7910





皇明詩選卷之五

哈佛大學  
圖書館  
珍藏  
印

田  
印

李 雯 舒章氏

雲間陳子龍臥子氏同撰

宋徵輿轅文氏

七言古詩一

高啓 再見

憶昨行寄吳中諸故人

憶昨結交豪俠客，意氣相傾無促戚。十年離亂如不知，日費黃金出遊劇。狐裘蒙茸欺北風，霹



塵應手鳴雕弓。桓王墓下沙草白。彷彿地似遼  
城東。馬行雪中四蹄熱。流影欲追飛隼滅。歸來  
笑學曹景宗。生擊黃獐飲其血。臯橋泰娘雙翠  
蛾。喚來尊前為我歌。白日欲沒奈愁何。迴潭水  
綠春始波。此中夜遊樂更多。月出東山白雲裏。  
照見船中笛聲起。驚鷗飛過片片輕。有似梅花  
落江水。夫差城南天下稀。狂遊累日忘却歸。座  
中爭起勸我酒。但道飲此無相違。自從飄零各  
江海。故舊如今幾人在。荒煙落日野鳥啼。寂寞

青山顏亦改。須知少年樂事偏。當飲豈得言無錢。

舒章曰神似太白遂為本朝七言古之前茅

轅文曰太白佳處在迴蕩轉折如不經意而景物俱在天際使人百思此作具

得三昧

臥子曰跌宕淋漓

宋濂

字景濂金華人洪武中官至學士坐事貶死

舒章曰潛溪猶襲元調伐宛一篇微見風格以開國文士之冠故錄之

題李廣利伐宛圖

二師城頭沙浩浩。二師城下多白草。六千鐵騎



皇明詩選 卷之五  
隨將軍風勁馬鳴高入雲。師行千里復引還。使  
者持刀遮玉關。烏孫輪臺善窺伺。宛若不降輕  
漢使。璽書昨夜下燉煌。太白高高正吐芒。戊甲  
重徵十八萬。居延少年最翹健。殺氣漫漫日月  
昏。邊塵冉冉旌旗亂。旄竿已揭宛王頭。執驅校  
尉青狐裘。惜哉五原白日晚。郅居水急遊魂返。

轅文曰亦是中晚遺調

特起手稍健故可存耳

臥子曰辭

調差合

張以寧

字志道古田人元末進士  
洪武中以薦起官至學士

閩關水吟

閩關之水來隴頭。排山下與閩溪流。閩溪送客  
東南走。直到嵩溪始分手。客居溪上雲幾重。鳥  
啼月出門前松。天風吹雲數千里。飄飄直度長  
江水。清淮浩蕩連黃河。碧樹滿地黃雲多。夢中  
長記關山路。隴水潺湲似人語。覺來有書不得  
將。海潮不上嵩溪陽。平原春晚生芳草。杜鵑哀  
鳴令人老。行人歸來動十年。潺湲隴水聲依然。  
安得湘弦寫嗚咽。彈作相思寄明月。



舒章曰清麗不弱

周是修名德以字行泰和人洪武中官衡府紀善後死靖難

長安古意

長安二月三月時。千門萬戶春風吹。綺閣瑤臺高照耀。香車寶馬竝驅馳。驅馳照耀將相家。王孫公子盛繁華。銀鞍斜度官溝柳。丹轂橫移上苑花。花明柳暗春明媚。嬌鳥亂啼花雨細。瑤宮錦殿傍雲開。鼉鼓龍簫震天起。美人內屋艷神仙。鉛華絃轉春爭妍。燁燁珠屏交綵幄。隱隱羅

幃分玳筵。蘭麝桂酒芬芳發。象筯瑤杯光彩徹。翠釜金壘不暫停。雕盤玉盃紛成列。迴瞻複道接雙龍。絳闕紅樓映碧空。流鶯獨繞昭陽殿。芳草深迷長樂宮。漢家中興富名將。百戰功成心益壯。閒來賭酒聚歡娛。意氣相排不相讓。酒酣徑上寶釵樓。赤闌四面俯皇州。一時粉黛成傾國。百種風流盡莫愁。樓前兩兩鴛鴦度。樓下雙雙鳳凰舉。鳴璫背解玉纖輕。弄色凝情羞不語。可憐光景最難留。秋風一夕生庭樹。昨日紅顏



美少年。今朝潦倒那能數。君不見廣成山中白雲宿。安期海上顏如玉。別來倏忽三千年。海水幾度桑田綠。

臥子曰酒酣二句殊有氣象

轅文曰雖於初唐未純然亦富麗

舒章曰起語殊健爽

### 曾棨

字子啓永豐人永樂二年賜進士第一宣德中官至學士所著有巢睫集

### 姚少師所藏八駿圖

周家八馬如飛電。夙昔傳聞今始見。銳耳雙分秋竹批。拳毛一片桃花旋。肉鬣疊聳高崔嵬。權奇如此真龍媒。霜蹄試踏層冰裂。駿尾一掉長飈迴。瑤池晏罷歸來早。絡月羈金照京鎬。紫鞵飛時逐落花。雕鞍解處眠芳草。由來駿骨健且馴。弄影驕嘶不動塵。有時渴飲天津水。五色照見波粼粼。圍官騎來難久駐。飲向春流最深處。珠銜寶勒不敢疎。直恐飛騰化龍去。古來善畫韋與韓。此畫豈同凡馬看。人間造次不可得。首



藉秋深煙雨寒。

舒章曰毛骨麤俊

陳員外奉使西域周寺副席中道別長句

漢家郎官頭未白。扈從初為兩京客。忽逢天邊五色書。萬里翩翩向西域。腰間寶劍七星文。連旌大旆何繽紛。解鞍夜臥營中月。攬轡朝看隴上雲。黃沙斷磧千迴轉。玉關漸近長安遠。輪臺霜重角聲寒。蒲海風高弓力軟。茲行騎從歷諸蕃。羶帳依微絕漠間。殘烟古樹羌夷聚。遠火荒

原獵騎還蕃。曾出迎通漢語。穹廬蒲萄酒如乳。舞女爭呈于闐粧。歌辭盡協龜茲譜。當筵半醉看吳鈎。上馬便著金貂裘。山川遙認月支窟。部落能知博望侯。草上風沙亂騷屑。邊頭日暮悲笳咽。行窮天盡始回轅。坐對雪深還仗節。歸來雜選宛馬羣。立談可以收奇勲。却笑古來征戰苦。邊人空說李將軍。

臥子曰子啓詩元美評為封節度東征之卒此作差有細柳部署舒章曰此詩如健兒躍馬殊見風力



韓文曰聲  
調似李願

王侁

字孟陽福清人永樂中官翰林簡討所著有虛舟集

短歌行

東風吹花墮錦筵。綠楊半驛青樓煙。主人自為  
鵲鴝舞。小伎更奏鴛鴦絃。當杯入手君不醉。落  
日已在西山顛。短歌一曲心茫然。請看明鏡高  
臺上。何須白髮悲芳年。

李東陽

再見

畫馬

前馬奔騰後馬逐。沙苑東來曲江曲。相遭意氣  
兩不平。踏盡長堤春草綠。奚官一騎高如山。金  
鑲玉勒聲珊珊。會呼羣駿出雲霧。同立春風十  
二閑。

舒章曰  
頗俊爽

李夢陽

明星篇

正德間早起聞內教場砲喊之聲作此篇也  
明星出地一丈高。天門沈沈魚鑰動。沙堤露下



玉珂寒。直廬鷄唱金蓮重。千門萬戶曉鐘發。明星漸高。河漸沒。燦爛疑侵翔鳳樓。依稀故抱飛龍闕。鳳樓龍闕帶曾城。翠輦朱衣夜夜行。黃昏競奏催花宴。天明猶聽打球聲。蘭烟桂火輝如日。明星迢迢照不入。百子池頭青草生。長信宮中紫苔集。草色苔香秋復春。此日乘槎若問津。明星曉落宵還見。白髮黃金愁殺人。

舒章曰起

手奇突

韓文曰以初唐體紀時事

而加之以雄健具見作手

### 楊花篇

洛陽三月東風起。楊花飛入千門裏。只見朝縈上苑烟。那知夕逐東流水。苑煙流水無休歇。暖日輕盈度仙闕。趙女瑤臺貯綵霞。班姬團扇啼明月。綵霞明月幾沈輝。陌上行人亂撲衣。征夫柳塞愁看鴈。少婦深閨懶上機。柳塞香閨萬餘里。草色連天度龍水。玉門關外雪猶飛。章臺樹裏風先起。誰家浪子千金馬。平明挾彈章臺下。頭上羅巾玳瑁簪。腰間寶鉞珊瑚把。踏絮來尋



賣酒家。持香坐調當壚者。當壚美女怨陽春。笑  
掇楊花襯繡裯。青樓薄暮難消遣。白雪漫天愁  
殺人。冥冥漠漠春無極。此時惟有楊花色。一朝  
風雨蘼蕪爛。獨操垂條三歎息。

舒章曰風  
華狎競

古白楊行

百泉東岸三古楊。下枝掃拂書院墻。上枝瑟瑟  
干穹蒼。空山野陰雷雨黑。柯榦冥冥動山壁。剪  
伐難爲棟梁用。盤踞番逃斧斤厄。但見白日悲

風發。寧知六月撐霜雪。煙色慘愴精靈聚。孤根  
倔強源泉裂。憶昨訪古憇其下。居人不敢畱車  
馬。落籜尚禁牛羊食。汗穢頗遭縣官打。丞相古  
栢霹靂碎。將軍大樹空蕭灑。岡頭石路莎草長。  
孫邵李許同一堂。春風漂泊予到此。不見古人  
惟古楊。古楊蕭蕭暮流急。波翻浪倒蛟龍泣。衛  
女幽憂拾錦花。逋臣寂寞愁難立。君不見太行  
羊腸莫比數。上有毒蛇下猛虎。樵斤獵火不虛  
日。桂栢椅桐氣淒苦。嗚呼楊兮楊兮爾何盤根



據茲土。

舒章曰。墜目虬

髯意氣不羣

臥子曰。低昂歷

落不減少陵

上元訪杜鍊師

宣皇昔時乘八風。御龍游戲行煙空。馬前兩兩侍玉女。別館多在蓬萊宮。朝天宮中舊時殿。樓臺畫鎖無人見。琉璃井塌青苔滿。松栢森森月如練。嗚呼往事難具陳。燈火如山又一春。北斗壇西訪隱淪。我師黃衫白氈巾。坐我更致西樓

賓。玉杯漱灑赤瑪瑙。織罽四角銀麒麟。酒肉山堆滿堂醉。仙厨往往來八珍。孝宗之朝五真人。師也磊落當其倫。自言召見親賜食。會把丹書獻紫宸。如今寂寞看春色。銀魚玉帶無消息。豈惟魚帶無消息。欲語吞聲淚沾臆。勸師對此莫酸辛。世間萬事如轉輪。且將芝草供生計。聊與煙霞作主人。月徧彩雲當牖生。旋呼兩童吹玉笙。古來仙子向誰在。飲者翻垂千載名。名垂千載亦區區。酒闌燈昏夜復徂。不見秦陵草已宿。



春生樹啼雙老鳥。此時亦應羣帝趨。金燈翠旗  
光有無。

轅文曰頓挫流  
麗意態橫出

奉送大司馬劉公歸東山草堂歌

東山有草堂。縹緲雲嶠孤。前對祝融峯。下瞰巴  
陵湖。明公昔時此堂居。麋鹿熊豕當窓趨。洞庭  
日落風浪湧。倒影射堂堂。欲動慘淡誰聞紫芝  
曲。獨善不救蒼生哭。先帝親裁五色詔。老臣曾  
受三朝祿。此時邊徼多戰聲。曳履謁帝登承明。

謝安笑却淮淝敵。魏相坐測單于兵。九重移榻  
數召見。夾城日高未下殿。英謀密語人不知。左  
右微聞至尊羨。自從龍去不可攀。公亦臥病思  
東山。湘娥含笑倚竹立。山鬼窈窕堂之側。上書  
苦死只欲歸。聖旨優容意悽惻。內府盤螭縷金  
織。賜出傾朝皆動色。白金之鉞紅票記寶鈔。生  
硬雅翎黑崇文城門水雲白。是日觀者塗路塞。  
城中冠蓋盡追送。塵埃不見長安陌。人生富貴  
豈有極。男兒要在能死國。不爾抽身早亦得。君



皇明詩選 卷之五  
不見。漢二疏。千載想慕傳畫圖。即如草堂何處  
無。祿食覩竊胡爲乎。乃知我公真丈夫。嗚呼乃  
知我公真丈夫。

臥子曰。是時獻吉初謫。而劉公去。公去而國事益變。故此作辭。渾而意傷。舒章曰。九重四句。君臣一氣。讀者悚神。

劉子有金陵之差。遂便覲省。

使君昔居紫荊關。日登燕嶠望吳山。逢人顏色鬱黯黯。對酒涕泗交潺湲。使君南向金陵去。孤帆夜拂春天樹。旅枕常欹月落時。夢魂先到雲

飛處。揚子江頭青草斜。大孤山前開杏花。行人三月重回首。游子一年初到家。出門烟草滿芳甸。鳳凰臺接麒麟殿。遊陌聯翩追宿娛。墨場婉變羅賓讌。人生意氣無南北。白馬青袍動江色。卽看艤舸石頭城。還聞稅鞅鍾山側。鍾山翠嶺壓秦淮。燕趙風雲入望來。芙蓉秋鴈多愁思。問君何日錦帆迴。

臥子曰。腴於高。適壯於李頎。

漢江歌送范子之桂陽



漢江江上是。鳩鳴。漢江遊客無限情。青山落日  
下帆影。芳草月明聞。擢聲。黃鶴磯頭暮雲盡。鸚  
鵡洲邊春水生。莫倚仲宣能作賦。洞庭南接桂  
陽城。

韓文曰清  
適似地功

送人使安南

安南陪臣騎馳突。歌吹春喧洱水窟。蛟潭飛雨  
動霹靂。鳥城毒雲開日月。黃門使者白澤袍。南  
來氣與秋天高。當今天子古聖人。諭爾歲事勤

包茅。永令炎海無波濤。

舒章曰黃門句  
如春濤映日  
韓文曰高  
壯尔直

送李帥之雲中

黃風北來雲氣惡。雲洲健兒夜吹角。將軍按劍  
坐待曙。紇干山搖月半落。槽頭馬鳴士飯飽。昔  
為完衣今繡襖。沙塲緩轡行射鵬。秋草滿地單  
于逃。

舒章曰獵  
獵風生



轅文曰矯健  
如秋鶻摩空

何景明 三見

轅文曰讀仲默明月篇敘似欲舍少陵而宗初唐然其于少陵深有所得特以秀色遠之或以為似李東川此其姿制流佚同耳東川取境甚狹仲默席矣雅語亦勝之

明月篇

僕始讀杜子七言詩歌愛其陳事切寔布辭沉著鄙心竊效之以為長篇聖於子美矣既而讀漢魏以來歌詩及唐初四子者之所為

而反復之則知漢魏固承三百篇之後流風猶可徵焉而四子者雖工富麗去古遠甚至其音節徃徃可歌乃知子美辭固沉著而調失流轉雖成一家寔則詩歌之變體也夫詩本性情之發者也其切而易見者莫如夫婦之間是以三百篇首乎雌鳩六義首乎風而漢魏作者義關君臣朋友辭必托諸夫婦以宣鬱而達情焉其旨遠矣由是觀之子美之詩博涉世故出於夫婦者常少致兼雅頌而



風人之義或缺。此其調反在四子之下與。暇日爲此篇。意調若髣髴四子。以俟審聲者裁割焉。

臥子曰此序深得風人之旨

舒章曰序是漢文

韓文曰此叙不獨爲七言古立說亦殊有功于風雅

長安月。離離出海嶠。遙見層城隱半輪。漸看阿閣銜初照。潑灑黃金波。團圓白玉盤。青天流景披紅藥。白露含輝汎紫蘭。紫蘭紅藥西風起。九

衢夾道秋如水。錦幌高褰香霧開。瑣闥斜映輕霞舉。霧沉霞落天宇開。萬戶千門月明裏。月明皎皎陌東西。栢寢岩堯望不迷。侯家臺榭光先滿。戚里笙歌影乍低。濯濯芙蓉生玉沼。娟娟楊柳覆金堤。鳳凰樓上吹簫女。蟋蟀堂中織錦妻。別有深宮閉深院。年年歲歲愁相見。金屋螢流長信階。綺櫳燕入昭陽殿。趙女通宵侍御牀。班姬此夕悲團扇。秋來明月照金徽。榆黃沙白路逶迤。征夫塞上行。憐影少婦窓前想。畫眉上林



鴻鴈書中恨。北地關山笛裏悲。書中笛裏空相憶。幾見盈虧淚沾臆。紅閨貌減落春華。玉門腸斷逢秋色。春華秋色遞如流。東家怨女上妝樓。流蘇帳捲初安鏡。翡翠簾開自上鉤。河邊織女期七夕。天上嫦娥奈九秋。七夕風濤還可渡。九秋霜露迥生愁。九秋七夕須臾易。盛年一去真堪惜。可憐揚彩入羅幃。可憐流素凝瑤席。未作當鑪賣酒人。難邀隔座援琴客。客心對此嘆蹉跎。烏鵲南飛可奈何。江頭商婦移船待。湖上佳人挾瑟歌。此時憑闌垂玉筯。此時滅燭斂青娥。玉筯青娥苦緘怨。緘怨含情不能吐。麗色春妍桃李蹊。遲輝晚媚菖蒲浦。與君相思在二八。與君相期在三五。空持夜被貼鴛鴦。空持暖玉擎鸚鵡。青衫泣掩琵琶絃。銀屏忍對箜篌語。箜篌再彈月已微。穿廊入闥靄斜輝。歸心日遠大刀折。極目天涯破鏡飛。

津市打魚歌

大船峩峩繫江岸。鮎魴鱖收百萬。小船取速



不取多。往來拋網如擲梭。野人無船住水滸。織  
竹為梁數如罟。夜來水長沒沙背。津市家家有  
魚賣。江邊酒樓燕估客。割髻砍鱸不論百。楚姬  
玉手揮霜刀。雪花錯落金盤高。鄰家思婦清晨  
起。買得蘭江一雙鯉。篔簹紅尾三尺長。操刀具  
案不忍傷。呼童放鯉。激波去。寄我素書向郎處。

韓文曰前半去張籍王建不遠後

半古秀獨絕即盛唐諸公却步矣

臥子曰調古辭俊便覺

少陵之作不免儉父

舒章曰結處婉變入情若作

泥沙失勢等語便為粗格

### 大梁行

朝登古城口。夕藉古城草。日落獨見長河流。塵  
起遙觀大梁道。大梁自古號名區。富貴繁華代  
不殊。高樓歌舞三千戶。夾道烟花十二衢。合沓  
輪騶交紫陌。鳴鐘暮入王侯宅。紅粧不讓掌中  
人。珠履皆為門下客。片言立賜萬黃金。一笑還  
酬雙白壁。帶甲連營殺氣寒。君王推轂將登壇。  
彎弧自信成功易。拔劍那知報怨難。已見分符  
連楚越。更聞飛檄救邯鄲。一朝運去同衰賤。意



氣雄豪似驚電。楊花飛入侯嬴館。草色淒迷魏  
 王殿。萬騎千乘空雲屯。綺構朱甍不復存。夜雨  
 人歸朱亥里。秋風客散信陵門。川原百代重回  
 首。宋寢隋宮亦何有。遊鹿時銜內苑花。行人尚  
 折繁臺柳。繁臺下接古城西。春深桃李自成蹊。  
 朝來忽見東風起。薄暮飛花滿故堤。

韓文曰日本之初

唐而小見鋒力

舒章曰聳于盧

駱繡于願維

聽琴篇

美人橫琴坐我堂。酒闌為鼓三四行。燈孤月明  
 客不發。弦悲調急秋夜長。吾家瑤琴久不拭。金  
 徽玉軫無顏色。感君對此如有情。一彈使我三  
 嘆息。樵歌響答山澗幽。楚歌慷慨雲夜愁。灑湘  
 猗蘭稍平逸。四座但覺清商流。始聞白雪停翠  
 竹。烈飈吹我溪上屋。忽然翻作廣寒遊。知是霓  
 裳羽衣曲。含宮移羽何春容。泠泠萬壑吟風松。  
 烟岑一夕怨鳴鶴。江天何處驚蟠龍。我初好音  
 惟好此。橫笛短簫徒聒耳。平生頗抱鍾期懷。四



皇明詩選 卷之五  
海難逢伯牙子。今夕何夕願不違。爲君擊節淚沾衣。高歌雅和人。世稀河轉參。橫君莫歸。

轅文曰結

句婉入

舒章曰序事平

秀舉體融暢

### 寄李空同

黃河臘月冰十丈。縱有鯉魚那得上。楚天鴻鴈避霜雪。未得逢春難北向。康王城邊沙草曛。梁王臺上多暮雲。野人歲晚誰相對。桐栢山中空憶君。

欽子曰  
盛唐

### 漢將篇

漢家西北烟塵起。烽火夜炤西京裏。胡虜奔騰一萬騎。關塞逶迤五千里。飛符插羽募精強。連營列陣掃邊疆。已見將軍屯細柳。更聞天子獵長楊。長楊羽獵兵威振。疊鼓鳴鉦聞遠近。龍虎遙分天上軍。魚蛇徧閱雲中陣。長安驄馬俠少年。金鞍玉轡鐵連錢。其看拔劍追驕子。自許彎弓射左賢。驚風晝起邊沙漲。疎勒黃雲迷所向。



皇明詩選 卷之五  
飲馬寒臨月窟傍。驅兵夜度天山上。降旗款節  
樹戎城。卷旆迴旌入帝京。征人半歿龍庭戰。壯  
士俱標麟閣名。麟閣功名不易得。貴臣良相徒  
顏色。威胡盡道李飛將。還漢誰言蘓屬國。玉門  
關外朔雲愁。燕領書生亦白頭。君王自憶廉頗  
輩。義士羞稱萬戶侯。

舒章曰。摧金伐

鼓旌旆。悠揚

### 隴右行送徐少叅

隴右地。長安西行一千里。秦日長城號塞垣。漢

時故郡稱天水。聖朝掃盪無烽烟。射獵之地

爲桑田。熟羗賣馬嘗入塞。將軍遊騎不出邊。知

君風采古遺愛。楊策傳符度關內。父老三秦望

節來。犬戎諸夷遮馬拜。開藩分道鎮邊塵。居守

巡行歷幾春。熊軾朱幡今豈伯。牙冠白筆舊臺

臣。瓦亭之西半山谷。土室陰陰連板屋。落月孤

城清渭源。寒雲古磧黃河曲。十年此地曾遊歌。

別來風物今如何。竹花秋臨鳥鼠穴。楊葉夕渡

魚龍波。回看萬里風雲色。少小趨庭淚沾臆。相



送悲吟。不盡情。關山隴坂高無極。

臥子曰

高壯

舒章日邊塞詩不獨雄亮兼有情思

### 五馬行

使君五馬來月氏。方瞳夾鏡光離離。長身峻耳高七尺。錦雲罕地玉花赤。杏韉蹙鐙雙盤龍。文羈翠刻金玲瓏。青絲遊韁縮不住。鐵色蹄翻錦苔地。天閑沙苑貯幾時。一朝分賜使君騎。使君行春嘗露冕。緩鞚張油下山縣。朱文露網動輕

車。四野人家望通懣。去年來時楚江秋。長鞭馳過黃鶴樓。楚城駿馬千萬匹。解鞍坐視不敢儔。今年朝天入五鳳。紅纓寶玦連錢重。曉隨鸞聲撼玉珂。九陌風微塵不動。天子命下巡吾州。輝光重整金絡頭。吁嗟吾州本狹促。迤徑寧當千里足。行行前駕肅且閑。郡人遙望雙旌竿。馳道父老應開顏。區區狐豕誰敢前。桑條吐葉青鬱鬱。滿路春塵繞車轂。使君不惜驅馳勞。無令暴吏登民屋。出門一送五馬行。我馬踟躕皆不



鳴相逢同是他鄉客。惆悵城邊暮春別。山亭草  
色細雨時。野館梨花寒食節。夕陽微微鄴城樹。  
寒烟漠漠淮川月。願言努力策霜蹄。千金重有  
登臺期。

韓文曰流

暢可喜

臥子曰佳辭

疊不覺其繁

舒章曰獻酬

詩乃爾不俗

### 田子行

君不見黃河西來北入海。千載却倒東南流。淮

水如絲納九曲。桐栢山作崑崙丘。我家清淮邊。

君家大河側。開闢二水今古同。人生變化無南

北。田子之生河降神。十五手掣生麒麟。二十辭

家觀國賓。三十謁帝爲近臣。赤墀青瑣日月上。

金馬銀臺河漢津。自矜一身遇明主。便欲登天

叩天鼓。天門晝闕守虎豹。雲師屏翳雷公怒。烟

氣縹緲隨飛龍。電光閃爍笑玉女。太清星辰下。

羅列歛忽闐闐生風雨。丹誠不回白日照。杞國

憂天獨勞苦。我持彤管雙鳳翎。浮沉帝傍近。



紫庭文園著書久消渴。據地酣歌常不醒。長安  
少女花在側。茂陵美妾空娉婷。漢王不好相如  
賦。方朔誰知是歲星。君不見楚人當時不識玉。  
海客無心采明月。明珠暗投反按劍。白璧三獻  
還遭別。君不見長孺從來歎積薪。公孫布衣為  
漢臣。千秋開口取卿相。董生白頭甘賤貧。我今  
與子俱落鬼。過飲悲歌慨今昔。咸陽酒客五花  
馬。邯鄲博徒千金擲。古來豪俠亦可喜。可憐聖  
賢皆厄塞。神駿翻為轅下駒。冥鴻已愧籠中翼。

出門與子常相憶。清淮大河見顏色。

韓文曰此詩頗冗于鱗取我持彤管以  
下八句作一首似不成章予為刪去中  
間二十餘語覺全首雄暢臥  
子以為當未審作者許我否  
舒章曰起有排天之勢  
結復收此極有章法  
臥子曰無此俊逸之  
致安可輕學青蓮

古井篇

君不見城邊古井荆棘荒。沙崩雨塌官道傍。當  
時碧甃映朱閣。黃金闌干銀作床。美人銅瓶響  
哀玉。寧知委棄同悲涼。梧桐花乾蘚花溼。鸞鷲



側窺蚯蚓入。百丈寒泉尚堪飲。心長綆短空愁立。

舒章曰結意深長

### 懷舊吟贈阮世隆

君家高樓對芳樹。開宴曾留三日住。銅槃絳蠟  
煖照春。金壺銀漏寒催曙。知君重義多豪游。滿  
門賓客爲我留。珊瑚不避鐵如意。驂騮皆纏金  
絡頭。爾時北上與君別。蔡州城外花如雪。夢裏  
猶尋汝上雲。醉中却憶淮西月。丈夫富貴各有

因。如君立身亦不羣。行年四十未白髮。生兒十  
八期青雲。君從秋日遙分手。我向東風一回首。  
山下長。塞舊。薜蘿樓前應長春。楊柳。

舒章曰金鞭紫陌蹀躞從容

韓文曰極似李廌而道麗過之

### 同崔子送劉以正還關中

燕川芳草歇已久。行子西行更回首。駿馬春停  
渭曲花。金鞭暮指秦中柳。看君兄弟皆豪雄。十  
年側想中丞公。東山雲月臥未起。北海賓客誰



皇明詩選 卷之五  
相通。荷花初紅。酒初碧。汝歸登堂。見顏色。若問  
長安舊友生。崔何二子常相憶。

舒章曰。意態自縱。

韓文曰。中有太白俊語。

### 周儀賓朝天歌

周君來從大梁發。搖鞭却指秦樓月。燕山臘盡春未生。可憐裘馬衝霜雪。憶昨雲霄謁帝關。春卿引見紫宸班。天門九重羅虎豹。一月不得朝龍顏。館甥帝室恩數少。尚女王家禮非小。中山

更傳聞樂對。陳王亦進通親表。伊昔梁王全盛時。車騎從官皆漢儀。遣使嘗聞八珍送。入朝數賜飛龍騎。百餘年間事勢殊。諸侯出或乘駟車。朱門賓從想冠劍。白頭王孫行路衢。君歸為我一問訊。梁園賦客今何如。

韓文曰。是時劉瑾痛厄。宗藩故詩人之言如此。舒章曰。序事淡古。

### 桃源圖歌

昔我遊武陵。坐石窺花源。岸圻丹洞闕。風迴綠



蘿翻崩崖奔古月。沓嶂響哀猿。行車一以過。始知人境諠。真陽仙令欲南往。手持新畫來相訪。武陵山水久不覩。今晨置我高堂上。巖穴如聞鷄犬聲。村墟但見桑麻長。髣髴潭水濱。點綴桃花春。山川似昔代。衣服猶秦人。回首茫然一烟霧。尋源誰復知真處。投簪福地終有期。畫中先認桃花樹。

舒章曰清

响自足

轅文曰

整秀

### 胡人獵圖歌

邊沙蕭蕭天北風。高林晝屯鞍馬雄。胡人裝束身手健。真與此圖形貌同。冬寒獵傍長城窟。城下平原日將沒。呼鷹放犬無不爲。數騎彎弓競馳突。月高琵琶海西城。拂廬雪乾氍毹輕。金鍾虜酒亦易醉。玉腕胡騶驕不行。白髮老胡黃戰裙。抽箭仰視天山雲。衆中若認射鵬手。漢家誰是李將軍。

臥子曰練

辭振拔



轅文曰不借色于少陵而其神自合

舒章曰氣色新爽不寄人籬壁

子昂畫馬歌

學士宋王孫。畫馬皆龍姿。曾寫飛黃出天廐。尚留雲影落瑤池。池頭馬官錦靴袴。緩鞚長牽時拂顧。萬里精神開絹素。百年毛鬣生風霧。吁嗟內乘無人識。想見奔騰過都國。翠仗朱軒數往來。金羈玉勒增顏色。只今天子罷南征。又聞東巡遼海城。安得四馬忽然生。登臺一顧千金輕。

天上嘗隨八駿行。

舒章曰結處不強合時事

徐禎卿 三見

送士選侍御

壯士樂長征。門前邊馬鳴。春風三月柳。吹暗大同城。蘆溝橋下東流水。故人一樽情未已。胡天飛盡隴頭雲。唯見居庸暮山紫。羨君鞍馬速流星。予亦孤帆下洞庭。塞北荆南心萬里。佩刀長揖向都亭。



舒章曰風

態健逸

轅文曰起手

是太白神境

唐生將卜築桃花之塢謀家無貲貽書見

讓寄此解嘲

予昔攀白日。虹蜺干紫庭。浮沈帝座側。無人知  
歲星側侍公車無所歡。聊騎天馬出長安。南下  
蒼江浮七澤。還攜謝客弄波瀾。青倪中開秀廬  
嶽。瀑布灑入千峯寒。冥冥仙氣貫南斗。直欲凌  
身燒大丹。迴裾西拂巫山浦。浩蕩歡心間雲雨。

歸來欲奏楚王書。漢主上林方好武。黃金不遇

心自吁。白壁無媒翻見侮。昨日結交燕少年。酣

歌擊筑市中眠。正逢天子失顏色。奪俸經時

無酒錢。入門百結鸕鶿。盡笑立文君。明鏡前却

思舊日高陽侶。黃公酒壚何處邊。天下綈袍誰

不憐。却卿未具山中橐。何人為買剡溪田。唐白

虎。真俠客。十年與爾青雲交。傾心置腹無所惜。

擊我劍。拂君纓。請歌鸚鵡篇。為奏朱絲繩。胡為

擾擾蒼蠅之惡聲。我今蹭蹬尚如此。嗟爾悠悠



世上名。

臥子曰入門二

語子畏真態

舒章曰跌

宕如意

轅文曰具得

太白操縱

寄華玉

去歲君為薊門客。燕山雪暗秦雲白。馬上相逢  
脫紫貂。朝回沽酒城南陌。燕山此日雪雰雰。祇  
見秦雲不見君。胡天白鴈南飛盡。千里相思那  
得聞。

轅文曰輕  
俊絕倫

青門歌送吳郎

吳郎醉嗜長安酒。落魄自言為客久。走馬頻看  
上苑花。回鞭幾折青門柳。青門曠曠。魚鑰開。乳  
燕游絲相逐來。柳下雕鞍畱別袂。花間酒盞覆  
蒼苔。浮雲去去辭城闕。芳草連天那可歇。野店  
春風聽早鶯。關河曉樹懸星月。千里淮流雙畫  
橈。廣陵驛前逢暮潮。落日帆歸揚子渡。青山家  
對伯通橋。吾家流水元非隔。宛轉胥臺通巷陌。



皇明詩選 卷之五  
草長難尋仲蔚居。林深不辨陶潛宅。清溪屋下  
可垂綸。復有萼羹足獻親。君歸倘食冰絲鱠。爲  
念羈棲塞北人。

舒章曰。朗朗清山出實境。自佳。結更有態致。

臥子曰。似勝李頎。

觀唐生寄贈子容洞庭山圖。因求作廬山

障子。

丹巒氤氳拂空起。素練平鋪洞庭水。迴谿笑指  
毛公家。忘却滄溟幾千里。我隔廬峯寢紫烟。嘗

騎白鹿上青天。煩君貌出仙人嶂。西寄長安向日邊。

王廷相 再見

### 金內翰五泉歌

海客凌扶桑。簸弄紅錦湍。蓬萊坐見水清淺。迴  
波不盡流人間。左綿山高天闕峙。中有飛泉噴  
清泚。烟霧春霏滄海瀾。珠璣夜濺星河水。灑空  
玉瀑翠微連。瑞靄靈氛散遠天。鸞儀倒映三珠  
樹。花氣遙通五色泉。泉裏仙人蘭臺客。愛挹清



冷坐朝夕。濯髮行修鴻寶篇。洗心時沃丹沙液。  
春來泉壑起鳴雷。天上風雲百道開。請看白日  
烟嵐窟。時有遊龍行雨迴。

韓文曰應酬之作不失

初唐格調亦稍近太白

孟

洋

字望之信陽人弘治乙丑進士累官大理卿

臥子曰望之詞調

鮮爽亦自斐然

韓文曰望之力宗大復僅

得其逸響故不耐深思

舒章曰望之氣體

不高亦自矜立

### 送僉憲李君惟大入關中

秦中昔游地。西望送行旌。雨雪經淮甸。春風入  
洛城。洛陽城中足高彥。君過故里多歡宴。天津  
橋邊新柳絲。桃林花煖啼鶯徧。紫氣函關路。青  
蓮華嶽祠。五陵富貴空流水。四塞烟塵異往時。  
使君按節行風俗。白日青雲炤巖谷。雲陽縣前  
涇水深。召公亭下春蕪綠。中興天子緩刑威。四  
海謳歌仰德輝。從容攬轡長安道。早晚風聲達  
紫微。

舒章曰幾與

韓翃李益近







皇明詩選 卷之六  
一  
巘層崖上紫清。中天日月炤樓閣。二十四巖金  
碧明。巖室洞房烟霧裏。玉戶金牕宛相似。丹井  
深通滄海潮。翠屏倒挂天河水。翠屏錦壁百千  
迴。綠岫青岑宮殿開。羽人龍駕去不返。仙吏仍  
飛雙鳥來。雙鳥朝天還帝鄉。飛來飛去名山傍。  
仙嶠雲霞長不改。天壇花藥依然在。却向山中  
寄紫書。故人闕下遙相待。

舒章曰七言古非君采所長蓋莊巖而不流宕也此作少勝故錄之

楊慎 再見

離席行送彭二

昔子從軍巴蜀山。橫戈千里何間關。坐使麒麟  
日月煥。行收魚鳥風雲閑。文武才名歸一姓。兄  
弟勲華許誰並。起晚已謝時運傾。當陽再覩乾  
坤正。陟岡在原來復返。海水天風歲將晚。行行  
白馬燕雪深。飛飛黃鵠秦雲遠。離堂命酒羽觴  
疾。畢昂盈軒月東出。主人畱連客離席。慷慨爲  
子歌。今夕。

韓文曰後半古調  
逸舉結勢更矯



寄張季文

美人別我歲幾華。碧草五見生天涯。東風東來  
飄錦字。忽如青天披雲霞。往年君向秣陵去。海  
夢橫分溧陽樹。今年君自滇池還。風光又隔點  
蒼山。佳期不得同攜手。惆悵令人青鬢斑。

臥子曰賦詞不

多逸興翮舉

韓文曰太

白雲仍

錦津舟中對酒別劉善充

錦江烟水星橋渡。惜別愁攀江上樹。青青楊柳

故鄉遙。渺渺征人大荒去。蘇府匈奴十九年。誰  
傳書扎上林邊。北風胡馬南枝鳥。腸斷當筵蜀  
國絃。

舒章曰惜別之

詞最為深健

賦得千山紅樹圖送楊茂之

蕭郎雅工金碧畫。愛畫碧鷄與金馬。畫作千山  
紅樹圖。行色秋光兩瀟灑。搖落深知宋玉悲。登  
山臨水送將歸。丹林初曉清霜重。紫谷斜陽赤  
燒微。故人辭我故鄉去。滇樹遙遙接巴樹。桑落



他山共醉時。楓香客路銷。魂處白首遐。荒老未  
還。流波落木慘離顏。錦城紅花那能見。千里隨  
君夢裡攀。

舒章曰音節最佳

韓文曰中有直用古語亦見老致

左國璣

字舜齊大梁人正德時舉人

韓文曰左君跌宕亦未成家

楚堂錢陳子之南都

我從夷門來。送君金陵去。楚館離筵春晝晴。楊

花。茫茫幾千樹。風吹亂撲金尊飛。行人且解碧

羅衣。鳴箏送酒勸君醉。明日出門知者希。

屠應峻

字文升平湖人嘉靖丙戌進士官至諭德

臥子曰屠公典麗流暢亦足名家

舒章曰文升風姿閒麗如玉樹風前是戶庭佳物

太乙壇歌

太乙壇高凌紫氛。宮中夜夜延神君。金盤千尺

瀉朱露。葦臺五色飛龍雲。撞鐘鳴鼓邀百祥。回

旌駐蹕瞻景光。石檢親封綠文闕。河圖著紀赤



皇明詩選 卷之六  
四  
符昌。九華燈明列星爛。八變樂終萬靈見。至尊  
端笏禮中天。北斗垂芒指前殿。皇皇圭璧奠甘  
泉。奕奕樓居通列仙。侍祀獨有東方朔。登歌新  
協李延年。白茅授冊侯五利。青鳥銜書作前使。  
貝闕徘徊河漢沉。絳節繽紛王母至。武皇北面  
來相迎。稽首至道聞要精。能驅三尸鍊五魄。可  
以閱世爲長生。帝聞斯言再拜受。宴罷言歸樂  
無有。祈年何必汾水陰。無爲自享南山壽。

臥子曰諷詞典  
厚有揚馬之風

舒章曰鋪敘纒

華不乏秀句

韓文曰亦太襲李頎

取其有爽勁之氣耳

### 歌風臺

漢皇昔日還沛中。四海爲家憶故宮。沛中父老  
獻牛酒。爭識當時隆。準公咸陽宮中鹿爲馬。茂  
碭山上雲成龍。子弟遞進鳴歌鍾。酒半泱泱歌  
大風。湯沐之邑恩澤隆。千秋萬歲樂無窮。人生  
悲樂須臾改。猛士之思復誰在。韓彭已醢英布  
誅。遺令猶令檻樊噲。古來豪傑總堪悲。沛水東



流西日微。歲歲山川猶故色。風雲不向沛宮飛。

臥子曰稍落議論未傷俊朗

韓文曰猶有初唐之調故可存耳

黃省曾

字勉之吳縣人嘉靖初舉人所著有五嶽集

韓文曰勉之志在範古而其才甚薄故合作寥寥

廬山吟

我聞匡廬山。西峙宮亭湖。少讀神禹經。昔為天子都。背岷南來幾千里。巍峯秀出名香鑪。石鏡孤圓炤閭闔。屏風九疊開蓬壺。盤霞錯日氣耀

燦。天雞紫鳳鳴相呼。匡君騰遊太清境。空留碧漢青山影。冬春不斷霜雪光。晝夜嘗看二輪景。天池猶餘慧遠方。蓮花宛種仙人杏。長風自昔吹二龍。明月當時炤三隱。予也縈懷十餘年。披圖蕭爽心冷然。行當騎鹿芙蓉頂。長嘯支磯玉女前。

唐順之

字應德武進人嘉靖己丑進士累官巡撫都御史

臥子曰應德氣象爽邁才情駿發使能深造當有超乘其後馳騫功名詭託講學遂類然自放



從軍行

匈奴十萬入雲中。烽火炤耀甘泉宮。戰士三春  
不解甲。天王一怒欲臨戎。追奔盡選流星騎。併  
力齊分明月弓。虜氣憑陵恒候月。漢兵超忽若  
乘風。已聞舊戍黃花口。復道新屯細柳中。飛沙  
颯沓迷亭障。組練繽紛皆北向。赤羽朝徵六郡  
材。白茅夜拜五丁將。呂郎磊落似劉生。許國從  
來氣不平。匣裏雄韜藏豹變。腰間寶劍作龍鳴。  
救散萬金收猛士。身騎匹馬出長城。雁行暗結

遼西陣。魚貫晴開海上營。誓同魯仲能飛箭。豈  
學終軍漫請纓。建節行行通大漠。檄書馬上時  
能作瀚海雲。連太白高。燕然雪炤旄。旄頭落。知君  
意氣坐相邀。直教一戰虜塵消。歸來奏凱獻天  
子。功名絕勝漢嫖姚。

韓文曰不失

初唐格律

許應元

字子春。錢塘人。嘉靖壬辰進士官至別使。

萬縣岑公洞作

赤日欲行且復留。縣宰開我城南游。輕風棹謳



絕江水咫尺便涉方壺丘。藤溪竹徑何歷巖。石  
室巖扉忽森瑟。乳泉滴瀝朝出雲。琪樹龍蔥晝  
含日。前簷漚漚瀟窺邑井。決波淪汙浴奔景。花嶼  
晴栖巫峽烟。笙臺暝接青城嶺。余悲城市不可  
住。日暮猿啼復當去。淹留追隣山鬼宅。彷彿安  
知羽人處。蓬萊方丈信依微。湖上青山待拂衣。  
明發還應牽簿領。巖前只有白雲飛。

韓文曰境

象森穩

皇甫湜

再見

霸橋歌送大梁郭僉憲

咸陽城東霸橋水。芳草乍拂春風起。秦官霸水  
行人淚。遙見驪山夕陽紫。臺中使君跨孤鞍。梟  
梟逸旆星霜乾。我筵短亭掃楓葉。仰頭白日明  
長安。國賓之子陳留彥。少年謁帝承明殿。古調  
文華奪流輩。錦袍玉質時人羨。王門齊舉萬年  
觴。綵衣自識仙郎面。陽春白雪梁園客。上元燈  
火岐陽宴。高堂二月別酒新。得意如君誰與倫。  
平沙走馬凌雲氣。花枝遙遙車入秦。倘因橋上



皇明詩選 卷之六  
垂楊發幸憶當年送別人

舒章已結處四  
語快心生色

淮上逢朱水部南川舊僚同張地官明厓  
吳山人河岳集駐鶴亭醉後感述贈水  
部一首并簡貽張吳二君

不見故人三載餘。况復經年無尺書。感君膠漆  
心尚爾。問我顏鬢今何如。憶昨同官在河墅。背  
負青天見毛羽。投跡誰招放逐寬。壯心不道風  
塵苦。繫纜祠陰一遇君。清尊江上念離羣。衣裳

欲逼梁苑雪。戶牖却吐瀟湘雲。吏隱雖殊氣相  
若。山人屢諷烟霞作。當筵自信同襟期。勝遊更  
盡新知樂。酒酣欲別仍徘徊。眼前感激令心哀。  
醉呼山人情勿猜。與爾長歌歸去來。

臥子曰寫情之  
作意盡而止

李攀龍 三見

臥子曰于鱗七言古實  
源李頎而雄整過之

舒章曰才氣過頎而學頎  
故有其俊邁而無其輕淺

送新喻李明府伯承



爾昔紅顏客薊門。獻書不報哀王孫。一朝致身  
青雲裏。座上還開北海樽。余亦題詩郭隗臺。燕  
山秋色對銜杯。論交共惜黃金盡。此處空悲駿  
馬來。可憐郢曲今亡久。下里之歌吾何有。文章  
稍近五千言。雅頌以還十九首。才子新傳白雪  
篇。江城忽借使君賢。那堪西署為郎者。多病離  
居臥日邊。

舒章日喜  
無冗句

轅文曰當時雅重  
伯承其詩實不稱

### 送張子參募兵真定諸郡

薊門管在胡塵中。匈奴火炤西山紅。瓊廬相望  
赤縣隘。腥羶未厭神畿空。君王拊髀過郎署。侍  
臣扼腕談邊功。每飯不忘鉅鹿戰。千金先發華  
陽宮。邯鄲少年游俠子。腰間七首懸秋水。出身  
願屬羽林兒。橫行誓奪單于壘。騰裝夜別縱博  
場。貫酒朝辭挾瑟伎。馬上風雲八陣成。帳前鼓  
角三軍起。故人新貴寵軒墀。亂後高名衆始知。  
國士漸看投筆至。主恩况許請纓為。天寒恒



嶽倚長劍。雪滿滹沱。擁大旗。歸來漢苑生春草。  
見爾論兵散幕遲。

賦得金谷園障子

誰將金谷傳毫素。座上無人不自顧。乍展旋驚  
澗水流。纔開已識河陽路。四壁真看片錦圍。中  
庭如見雙鬟度。移席休臨墜妓樓。解衣欲掛沙  
裳樹。彷彿明妃出塞吟。聽來未必梁塵誤。詩成  
酌我我豈辭。便過三斗無論數。綠珠安在恰當  
壚。似留且往勢可呼。意慘崑崙紫窳窳。色寒滄  
海紅珊瑚。君家富貴合如此。此時那知有障子。  
縱然客散掩空堂。猶聞夜夜春風起。

臥子曰起甚徑  
捷結有餘姿

送趙員外行邊

狐白之裘紫駟馬。鳴鞭東走漁陽野。自言天  
子授長纓。明光殿前三使者。飛檄遠度桃花山。  
昨日遼西較戰還。吹律春風回黍谷。揚旌暮雪  
灑榆關。關門一望烟塵色。抵掌志馳伊吾北。豈  
獨秦人重繞朝。誓令羗虜避充國。此行不按督



亢圖欲畫地形取匈奴。指揮千障鐵如意。出入  
 雙鞬金僕姑。驃騎將軍綠沈甲。鷄鳩大夫黃石  
 法。積裏兵屯種玉田。雲邊燧起彈琴峽。元戎幕  
 府贈吳鈞。太守離歌岐麥秋。看君歸奏稱上意。  
 何足道哉萬戶侯。

轅文曰。輶綺二

語句法健實

舒章曰。旌旗翼

翼金鐵皆鳴

賦得狼居胥山送李侍御

材官十萬絕大幕。踰河一戰胡兒却。夜縱翼兵

襲章渠。繫以往封狼居胥。姑衍山頭列旗鼓。中  
 壇擁燧陳首虜。帳前面縛三當戶。驃騎將軍醉  
 歌舞。北風千里雲摧頽。瀚海波濤蹴日迴。漢家  
 天子雄才哉。捷書親發栢梁臺。君持繡斧五原  
 郡。牧馬單于不敢問。黃沙白草寒冥冥。今年爲  
 王犁二庭。

送謝茂秦

孝宗以來多大雅。布衣往往稱作者。謝家玉樹  
 操郢音。其曲彌高和彌寡。寓梁曾曳王門裾。遊



燕欲薦中涓馬。豈無冠蓋映當時。滿眼悠悠世上兒。文章千載一知己。交結何須鍾子期。此物有神兼有分。富貴浮雲不與之。盧楠坐銜越石恩。醉後感激肝膽言。蒼鷹睚眦鸚鵡賦。身挂羅網何由齏。殷憂楚奏秦庭哭。遂雪黎陽國士冤。歸去東將釣滄海。安能貧賤嘗丘樊。早借江鴻報消息。或臥春雲且故園。

臥子曰李謝意氣如此句以不終舒章曰堂堂而來氣滿心暢

送公實還南海

梁生偃蹇誰與倫。梁生偃蹇無與倫。為郎十月不厭意。上書乞歸南海濱。文章往往近時好。富貴安得嬰其身。獨存肝膽論交者。一一凌雲作賦人。憶昨擊筑飲燕市。酒酣以往氣益振。黃金之臺空嶙峋。華陽之館摧為薪。駒駉駉耳俱良馬。劍客博徒皆俊民。梁生徐生情最親。宗生王生詩更新。經過但坐歌白雪。罷曲彷徨若有神。揮毫夜夜搖星辰。襟期矯矯何能馴。梁生此事



成萬古。欲別牽裳遂具陳。羅浮之山何崔嵬。下  
臨莽蒼波濤開。維舟跋浪長鯨出。倚杖垂天大  
鳥來。北望中原寥廓哉。飛厓坐攬百粵色。羣峯  
黝渺行風雷。梁生之廬構烟霧。千尋薜荔青摧  
頽。有時高咏反招隱。巖壑無人秋雨哀。尉佗椎  
結本趙俠。陸賈縱橫亦漢才。丈夫有道在龍蹻。  
還能與世相裴徊。梁生何爲終蒿萊。梁生慎勿  
終蒿萊。

舒章曰起結亦本子  
美中間敘致輕矯

韓文曰雜而不  
亂在李杜之間

### 楊山人

千。筐。湖。綿。白。雪。開。滿。江。稻。色。黃。雲。來。山。中。客。醉  
領。其。頽。自。言。七。十。巖。耕。者。帝。於。我。有。何。力。哉。

舒章曰起二語  
是風土佳境

### 送永寧許使君

邢。州。十。月。洞。白。楊。城。頭。出。雲。垂。太。行。把。酒。相。看  
日。欲。墮。五。馬。踟。躕。大。道。傍。問。君。胡。爲。萬。里。去。小  
臣。罪。合。投。窮。荒。我。聞。西。南。羅。施。國。風。氣。鬱。塞。殊



陰陽長官。椎髻見朝吏。海蠻醉鼓橐中裝。男兒  
貴至二千石。何地不可稱龔黃。壯遊須令百粵  
盡。探竒更得浮沅湘。永寧自惡無瘴癘。明年雨  
露生還鄉。

轅文曰。起手賦景奇。鬱結亦爽。直有古意。

歲杪放歌

終年著書一字無。中歲學道仍狂夫。勸君高枕  
且自愛。勸君濁醪且自沽。何人不說官遊樂。如  
君棄官復不惡。何處不說有炎涼。如君杜門復  
不妨。縱然疎拙非時調。便是悠悠亦所長。

臥子曰。似達夫。

舒章曰。入道之言。愈淡愈老。愈壯。

和殿卿春日梁園卽事

梁園高會。花開起。直至落花猶未已。春花着酒  
酒自美。丈人但飲醉。即休。纔到花前無白頭。紅  
顏相勸若爲留。春風何處不花開。何處花開不  
看來。看花何處好空回。

臥子曰。比之岑嘉州。韋員外作。差增妻繫。



韓文曰法  
圓調高

王世貞 三見

韓文曰七言古僅能作唐調耳元美自許在北地濟南之上殊不能然  
臥子曰元美七言古搜引匠心但覺才情敏妙

寶刀歌

昆吾精鐵光灼爍。不論風胡手中作。涪江水淬明月寒。漢冶風迴赤蛟躍。鋒尖七曜隱芙蓉。匣裡雙環吐龍雀。少年醉舞洛陽街。將軍血戰黃沙漠。記取銜恩一片心。扶君直上麒麟閣。

韓文曰元美小時筆墨如此宜其自許

贈梁公實謝病歸

汝謀結室羅浮頂。下飲仙人葛洪井。桂樹宛宛山日深。松花濛濛白雲冷。我亦僅買蜻蜒舟。歸與少年為薄游。采蓮一曲杳然去。得醉即臥清溪頭。

舒章曰轉便游意如吳兒刺舟

昌平侯鐵券歌

英皇昔日困魚服。慘淡四廟精靈哭。乾坤膏血



皇明詩選 卷之六  
付虜馬。烏鵲晝向行人啄。于公石師獨當柄。指  
顧號令無翻覆。天下勤王頗不少。楊侯上谷能  
神速。鳴鞭游騎出飛狐。咋指單于遁涿鹿。侯氣  
已見平吞虜。左右弧矢垂雙箠。居庸關頭落日  
黃。饑卒盡飽降胡肉。新皇論功獨召宴。劍履醉  
向明光宿。貂蟬換出驚妻子。犀玉手授稱腰腹。  
當時報功恨不極。促製鐵券黃金飾。無論此券  
一尺鐵帶礪河山。開社稷。百年倏忽豈更遠。里  
門不朱挿荆棘。洛下唯聞許史封。邊陲尚指楊  
王力。即看鐵券黑似漆。金書黥黷無顏色。豈唯  
金書無顏色。侯家子孫看不識。爲道己巳年間  
事。始復吞聲淚填臆。昨者薊門火。橫連甘泉北。  
捷書未必當賊鋒。血戰還應長見抑。尚方之券  
陳如山。男兒赤手那可得。君不見濠梁勛舊奚  
足數。墳墓秋霜竄鼯鼠。于公喪元石帥族。風塵  
久賴成心膂。

舒章曰若無一結  
全篇俱不見警筆

馱于日微  
繁于子美



觀李于麟射歌

李侯手挽三石強。左射右射勢莫當。欽羽猶然  
動逸勁。白日迴接星飛芒。綵旌亂馳鼓人震。徐  
挿繁弱神揚揚。江南野夫不肯降。氣挾岱嶽超  
扶桑。乍騰手勢身亦轉。矢落不見東西颺。道傍  
兒女相走笑。比着束手無餘長。主人玉杯競前  
醉。李侯頗欲誇其技。自云昔日師劉燾。罷看詩  
書馳獵騎。珊瑚僕姑。千金裝戎。錦韎韐。五花隊。  
燾也。逡巡獨前出。指顧萬象俱辟易。皎如宵月  
橫控弦。颯爾秋霜見鳴鏑。衆看雲中一片白。宛  
轉血墜摩空翼。猿猱叫號麋鹿竄。如以跣手割分  
肩肋。精能遠出都護右。猛志坐奪苻官色。風塵  
將相在一身。往見王攬甘泉策。劉子慷慨欣握  
符。李侯沉冥困執戟。非但折節攻三餘。亦逐時  
人理簿書。雄心隱隱見眉睫。世事忽忽甘籟蔭。  
英雄善藏須莫識。辱國之藝何秋戲。我醉爲歌  
平原下。青霾森森日色亞。安得一箭萬里空野  
夫飽飯看君射。



夫賦賦 臥子曰壯 慨可誦

平賦下 韓文曰鋪敘 自見作家

英雅善 舒章曰追述一 段更是神旺

八賦送盧生還吳

盧生善詩逸者流。百結鸛鶴安足愁。輾然一笑別我去。春花落盡胡姬樓。欲留不能意彌惻。衆中誰憐好顏色。短裘倘過邯鄲道。青艸已沒平原宅。吳趨小娃迎問郎。北游滿地塵茫茫。采菱深處唱一曲。豈若蘆茄能斷腸。

放歌送王明佐

漢代梁伯鸞。揮手出秦關。五噫滿天地。其人闕闕間。千秋王生亦如此。北游黯淡風塵裡。海上珊瑚屬銀漢。匣裡蓮花鬱秋水。侯門馬勃空見收。燕市狗屠無不游。黃金自兀國士館。黑貂且付胡姬樓。天子方祠太乙神。甘泉賦客爭前陳。豈無蜀人揚得意。相如不救成都貧。薊門駛騾雪花白。臨別殷勤繞朝策。病夫竟逐車塵歸。偃蹇衣冠失顏色。掉頭汝誇五嶽盟。鞭扶萬象



無留行。眼前歲星人未識。何用區區變姓名。

金吾行贈戴錦衣

金吾緹騎不可當。迥若饑鶻搏大荒。碧瓦雕甍  
戰囓吼。貂裘玉勒紛輝光。但令奚雛剪頭至。赤  
手臥奪黃金章。人間陸海天茫茫。豈無英雄遂  
俛首。戴子不肯誇身強。邀我坐我堂中床。葡萄  
暖發茵陳香。羽聲春激白帝霜。五侯七貴他自  
足。要令名姓登詞場。嗚呼戴子一洗金吾色。野  
人愧殺尚書郎。

何章曰中間

別有所刺

懷柔六槐歌

懷柔署中六槐樹。小者百尺凌穹蒼。五如五嶽  
峙大荒。一若小室嵩之陽。行天白日不能下。呼  
雨闌風勢莫當。金錢萬緡奪春色。珠璣千斛搏  
秋霜。饑鳥恠鴟啼不歇。亦許狐兔穿其傍。根蟠  
老大托后土。區區斧斤寧見傷。東家梧桐僅人  
立。青皮剝落神摧藏。雖有鳳皇不肯顧。安得送  
汝參天長。



舒章日亦寓言也意似在分宜  
韓文日亦是風人之遺

送許永寧

許生少小青雲客。一日交遊滿東國。是時歷下李于鱗。徃徃道汝文章伯。薊門紅塵萬楊柳。五馬忽停趙州守。吾徒零落聲華盡。且復低眉事奔走。清霜片片炤吳鉤。北斗插地河西流。要知肝膽酒邊露。還是當年荆聶儔。

韓文日此詩原本頗拖沓故刪其半却是成章

酌孫太初墓

死不必孫與子。生不必父與祖。突作憑陵千古人。依然寂莫一杯土。道場山陰五十秋。那能華表鶴來游。君看太華蓮花掌。應有笙歌在上頭。

舒章日起語奇突要是太初實錄也

殷司馬平廣西寇歌

殷公文武邦之楨。不學淵源空有名。一歲再遷中執法。兼提六管嶺南兵。如雲鸞鶴排千艦。五色神羊映百城。征南將軍不穿札。渡瀘相公單



白。哈。軍。聲。雷。動。細。柳。營。殺。氣。霜。凋。大。藤。峽。任。是  
蠻。烟。開。羽。扇。還。留。漢。雨。澆。金。甲。狼。兵。錦。鞬。繡。螿  
弧。奪。得。生。徭。換。酒。沽。早。知。不。殺。稱。神。武。悔。自。跳  
踉。作。後。夫。處。處。春。田。催。布。穀。朝。朝。列。肆。喚。提。壺  
千。秋。獲。嘉。縣。重。覩。伏。波。不。得。驕。銅。柱。灘。水。灘。和  
鏡。吹。聲。鬱。林。花。滿。旌。旗。路。遙。望。蒼。梧。雲。正。蒼。是  
公。功。成。勒。銘。處。

詩章曰結  
有神致

寄許左史兼訊西亭王孫

詞。客。不。寂。寞。故。人。多。輝。光。許。侯。白。厭。五。馬。去。十  
年。相。齊。復。相。梁。大。梁。夷。門。已。非。故。大。梁。游。俠。猶  
傾。慕。共。道。青。雲。公。子。交。還。誇。白。雪。相。如。賦。病。夫  
偃。息。東。山。廬。自。言。于。世。無。所。如。倘。遇。漢。朝。劉。子  
政。爲。求。鴻。寶。枕。中。書。

轉文曰此元美  
之擬東川也

送陸君儀部起家分賦得冶城

謝。公。晉。未。達。與。客。登。冶。城。一。爲。遺。世。言。口。吻。烟  
霞。生。東。山。高。臥。三十。載。遠。志。雖。饒。壯。心。在。躡。屐



皇明詩選 卷之六  
能開大桁烟。圍碁直賭秦淮塞。英標爾復冠人羣。強爲天書辭白雲。謝公墩頭初月上。千古風流併在君。誰憐誓墓長耕者。曾是同游王右軍。

臥子曰結以自况

爲劉侍御題清舉樓

主人高樓號清舉。主人卜築今何所。橋畔船歸虎丘寺。門前客散桃花塢。爲言塵市無所歡。聊從物外得奇觀。習習蘭芝繚戶牖。紛紛虹雨挂闌干。倦來獨岸華陽幘。鄴侯圖書周四壁。捲簾

忽舒東海霞。挂頰且看西山色。風前胥口幾葉帆。月下吳閶一聲笛。元龍之客不可留。東陽八詠誰能酬。鶴背翩然別君去。白雲無盡五湖秋。

寄漳日亦復清宕

轅文曰亦是東川之遺

登邯鄲叢臺有感作叢臺行

邯鄲叢臺已非舊。請說邯鄲舊時有。吳家倩女茗乍榮。和氏連城月初剖。臺上奏伎邯鄲姬。臺下拔劍邯鄲兒。銜將恩去身俱賤。報得讎來主



不知君莫謂平原好公子。三千去後應無幾。堂中客傍信陵門。軍前士歿長平壘。叢臺不盡更檀臺。回首豪華安在哉。自是魯連東海蹈。千秋白日聳蓬萊。

臥子曰發音赴節琅然玉舉

謝

榛

字茂秦臨清人嘉靖時山人所著有四溟集

舒章曰茂秦詩神簡律發如摩天俊鶻每擊必中

臥子曰茂秦沉練雄渾法度森然真節制之師也。又曰茂秦地位于鱗之下。徐吳之上。元美評其所製最當而未免以蕭朱之嫌。左祖濟南抑之太甚。此文

人之交不足重也

韓文曰四溟集余所細閱五言古學少陵而加以俗了無可取七言古亦具體耳惟五七言律切實衡當是其所長然法律束之不無微恨。又曰茂秦近體在元美上于鱗能以變化勝之

送劉戶曹成卿使荆楚

帝將北伐歲云暮。使者南徵三楚賦。借問何人當此行。東平文學今劉楨。朔塞風塵暗赤縣。中原戎馬疲蒼生。飛旌直下武昌道。黃鵠磯頭見春草。仙侶不來空倚樓。漢江東流波浩浩。孤鳳



叫天天上聞。野田鳥雀何紛紛。湘竹遙連洞庭  
 雨。衡山半落蒼梧雲。雲岑烟樹莽相似。猿聲至  
 今悲帝子。有才偏抱千古愁。片月多情照湖水。  
 國計艱難非管時。君今肯醉習家池。無限悲歌  
 楚人調。秋風獨遣騷人知。

韓文曰茂秦七言

古亦刻意濟南

舒章曰湘竹二

語寫景淋漓

吳國倫 三見

送徐行父少叅赴關內

咸陽天下險。洛邑天下中。潼關畔。睨周西。東君  
 自三川。歷三輔。分陝經營。王命同。登車慷慨  
 千人雄。矯若八翼凌蒼穹。左馮翊。右扶風。漢闕  
 秦畿指顧通。為將匣裏雙龍劍。擲作天邊二華  
 峯。

舒章曰結

自雄俊

過五郎磯

黃龍洲前雪浪飛。浪花疊作五郎磯。小艇縱橫  
 截洄湫。張網捕魚一何速。造次經過不知險。坐



愛山衣綠如染。閒情沙鳥俱悠悠。萬古蒼茫江漢流。

韓文曰  
峭健

舟泊漢口司馬陳公載酒渡江為長夜之

飲賦謝

蒲衣竹笠滄浪叟。玩弄烟波忘白首。短棹乘春  
泝大江。東風送之過漢口。漢水西來高接天。洪  
濤猛蹴羣山走。落日全昏鵠渚磯。停舟且繫晴  
川柳。隔江簫鼓何殷殷。樓船如屋旌如雲。戈艦

儼開魚麗陣。旄鈴疑勒水犀軍。中流小隊傳呼  
急。夾岸材官次第分。為道總戎能載酒。招尋野  
客來江濱。大別山頭月未午。江光千里明於組。  
錦纜牙檣動列星。金樽綺席臨芳浦。禮數先從  
入坐寬。中懷竝借銜杯吐。登歌不采大堤謳。擊  
劔何煩長袖舞。憶自君侯鎮荆服。簪貂插羽無  
亡鏃。坐使蠻夷款自輸。祇今江漢平如陸。百年  
此夕會偏奇。絳燭屢更歡未足。君不見郎官湖  
上鷗。不驚處士洲前艸。增綠。



臥子曰鋪

敘穠雅

轅文曰意

境新逸

舒章曰結語閒

雅別自一調

宗 臣 字子相興化人嘉靖庚戌進士

部考功郎中出為福建提學副使天

卒所著有方城集

舒章曰子相天姿明佚好自頽宕其得

意處僅得太白之粗者故予輩刪之頗

嚴然不可謂

非其功臣也

臥子曰子相意取秀逸不尚

深思從此入者易流淺俗

歸嘆

薊門春盡雲陰陰倚杖出門愁暮禽。千金裘馬

只自好。萬里江湖誰復尋。武陵一別桃花深。欲

歸不歸傷我心。青楓未老楚月白。吾將長嘯投

吾簪。

舒章曰玉山頽

唐自有佳致

轅文曰子相七言古全擬太白

但得其庸此作取其不作意

盧 枏 再見

贈別南田楊子還晉石

我本衛川豪。君作燕城客。意氣各千里。相逢在



燕陌。燕城燕陌跨京華。青煙作帳銀爲沙。五侯  
 龍馬耀金鞭。蒼螭寶帶屈盤拏。層城日出歌鍾  
 起。繡戶珠箔幌羅綺。遙憶夔龍集鳳池。亦知衛  
 霍矜戚里。笑倚青萍劍。耻上黃金臺。昭王非帝  
 冑。樂毅自凡材。燕丹空有心。荆卿徒悲哀。白虹  
 沒長雲。易水不能迴。瑤華翠葆浮雲沒。錦石雕  
 甍秋後伐。古人已見覆蒼苔。今人空對西山月。  
 西山月出宮殿寒。坐愁白髮驚飛湍。風雲萬里  
 不相待。白羲垂耳蛟龍蟠。雞鳴開九關。天

狼若可攀。勢欲請長纓。繫胡燕然山。長纓繫胡  
 心不朽。君去青山但揮手。落日天風吹海波。月  
 明來勸一盃酒。酒中慷慨樂事無。據地酣歌玉  
 唾壺。晉石山川爲君迂。千巖萬壑來長途。往日  
 春光懷我處。奇花不盡相思樹。葡萄露下餘空  
 醅。終日待君那能顧。滄洲今已暮。瑤艸不知路。  
 欲乘黃鶴一問之。爲予淨掃南田霧。

臥子曰未見佳  
 境而豪頓可觀  
 舒章日亦疑太  
 白一往有氣



羸女鳳圖

秦臺明月下。炤見乘鸞女。玉簫聲不聞。緘情空  
復許。相思何處憶離羣。欲報佳期隔綵雲。懷中  
知有瓊華字。夜夜清光獨映君。

轅文曰  
清舉

贈別李性菴還任丘

燕郊十月飛胡霜。臨岐送子各盡觴。腰間笑解  
延陵劍。雪花墮地蛟龍翔。都門佳期那可顧。相  
思開遍三花樹。歸時倘遇浮丘公。為予接引嵩

高去。

于慎行 再見

大隄曲

大隄春盡花如雨。大隄女兒隔花語。揚州估客  
四角幡。暮泊蘭橈宿江渚。芙蓉寶帳綠雲鬟。翠  
簾銀缸夜色寒。倚瑟當壚春酒盡。卷帷望月曉  
褰殘。石城一曲歌未足。日出天空江水綠。含啼  
送客更多愁。腸斷州波萬里秋。

轅文曰亦本太白然  
已在張籍王建境



馮

琦

號北海萬曆丁丑進士累官禮部尚書謚文敏

臥子曰宗伯經術之士其詩雖未冥搜亦能象合

題閼氏畫像

紅粧一隊山陰下。亂點駝酥醉朔野。塞外爭傳娘子軍。邊頭不牧烏孫馬。

大觀春 順夫人而作 韓文曰此為忠

袁宏道

字中郎公安人萬曆中進士官至吏部驗計司郎中

古荆篇

年年三月飛桃花。楚王宮裏鬪繁華。雲連蜀道

三千里。柳拂江堤十萬家。丹樓繡幌巢飛燕。古

閣文牕起曙鴉。鴉飛燕語等閒庶。不記江城春

早暮。東風香吐合歡花。落日鶯啼相思樹。王孫

挾彈郢門西。少年借客章臺路。少年矯矯名都

兒。雕鞍朱勒黃金羈。採桑陌上青絲籠。紅粉樓

中白紵辭。白紵綠水為君起。青春環珮如流水。

東城絲管接西城。相府豪華壓朱邸。俠客飛鷹

古道傍。佳人賣笑垂楊裏。垂楊二月隱朱樓。家

家宴喜樓上頭。綦鳥喧闐朝送酒。管絃嘈雜夜



皇明詩選 卷之六  
藏鈎繁絃急管夜初闌。惜花少女怨春殘。桃花  
灑灑雲成綺。蘭炷漫漫火送寒。曉風楊柳菖蒲  
浦。秋月梧桐金井欄。秋月春花無斷絕。門前桃  
李幾迴折。願作陽臺雨後雲。誰憐洛水風中雪。  
陽臺洛水夢空長。那似倡家玳瑁牀。羊車共羨  
東鄰子。寶帳新憐西曲娘。織成錦席迷蝴蝶。種  
得青梧棲鳳凰。遊人戀戀無窮已。踏遍江城春  
萬里。只解賓從集似雲。那惜年光去如矢。花開  
花落迥生愁。郢樹鄢雲幾度秋。霍氏功名成夢

蕭梁王臺館空山丘。榮枯翻復竟何言。昨宵弱  
水今崑崙。無人更哭西州路。有雀還登翟氏門。  
漢恩何淺天何薄。百年冠帶坐蕭索。咎時嗟氣  
成烟雲。今朝失勢委泥礫。青娥皓齒復何人。金  
妝玉機爲誰作。已矣哉歸去來。楚國非無寶荆  
山。空有哀君看白雪。陽春調千載。還推作賦才。

臥子曰石公才情本自流

麗此篇似刺江陵公作

舒章曰中郎淺俗有元白之風

此詩彷彿初唐鍾譚猶未望見

轅文日筆

意妍美







